

經義考

冊三

圖書集成

經義考卷十五

秀水 朱彝尊 編

男 昆田 校

易十四

東鄉氏助周易物象釋疑

唐志一卷

未見一齋書目有

助自序曰易以龍象乾以馬明坤隨事義而取象是故春秋傳辭多因物象而六十四卦三百八十四爻之文觸類而長洎甲子以六十爲運而卦則六十四爲周六十四而參六十合九百六十年爲一元紀助今采於往疏未釋後學滯懵者標出目爲周易釋疑屬象比事約辭理伸云爾朝散大夫守江陵少尹柱國賜紫金魚袋東鄉助上

蔡攸序曰昔者聖人之作易也始畫八卦而象在中象與卦並生以寓天下之蹟故曰易者象也蓋俯仰以觀遠近以取神明之德可通鬼神之情狀可得而況於人乎況於萬物乎及因而重之發揮於剛柔而生爻則擬諸形容者其變不一而象亦爲之滋矣故

邑屋宮庭舟車器械服帶簪屨下至鳥獸蟲魚金石艸木之類皆在所擬至纖至悉無所不有所謂其道甚大百物不廢者此也其在上古尙此以制器其在中古觀此以繫辭而後世之言易者乃曰得意在忘象得象在忘言一切指爲魚兔之筌蹄殆非聖人作易前民用以教天下之意也助之作書盡推互體變卦之法以明爻象可謂有意於此矣而學之不明言之不擇往往傳致牽合先後牴牾學者蓋疑焉雖然後之學易而觀易者必自助發之故著其書以示來者

崇文總目唐東鄉助撰取變卦互體開釋言象蓋未始見康成之學而著此書

中興書目唐守江陵尹東鄉助撰其說以象之所生生於義也有斯義然後明之以物如以龍敘乾以馬明坤之類

陳振孫曰東鄉一作東陽館閣書目又云守江陵尹東陽東鄉皆複姓也其序言隨事義而取象若以龍敘乾以馬明坤凡注疏未釋者標出爲此書

董真卿曰宋宣和四年蔡攸上其書

崔氏夏佐易忘象

佚

唐宰相世系表良佐湖城簿

唐志注良佐深州安平人日用從子共居白鹿山門人謚曰貞文

孝父

元氏載集注周易

唐志一百卷

佚

劉昫曰載詔輔國以進身弄時權而固位衆怒難犯長惡不悛家
亡而誅及妻子身死而殃及祖禰雖著文章殊乖德行

項德棻曰丁子襄注周易全書二三萬言而元載集注則一百卷

李氏

吉甫易象異義一作注一行易

佚

舊唐書李吉甫字弘憲趙郡人金紫光祿大夫中書侍郎平章事
集賢殿大學士監修國史上柱國趙國公嘗討論易象異義附於
僧一行集注之下

劉氏

禹錫辨易九六論

一卷

經

義

考

卷十五

二中華書局聚

存載中山集

新唐書劉禹錫字夢得自言系出中山擢進士第登博學宏詞科淮南杜佑表管書記入爲監察御史擢屯田員外郎貶連州刺史裴度薦爲禮部郎中集賢直學士度罷出爲蘇州刺史以政最徙汝同二州遷太子賓客會昌時加檢校禮部尙書

畢氏中和撰著法

佚

朱子曰畢氏撰法視疏義爲詳其論三撰皆挂一正合四營之教惟以三撰之掛劫分措於三指間爲小誤然其大數亦不差也

按劉夢得與董生言易辨易九六曰乾之爻皆九而坤六何也生曰我聞諸畢中和云舉老而稱也又謂董生言本畢中和中和本其師師之學本一行行云柳子厚與夢得書以爲中和承一行僧得此說子厚詆爲膚末而夢得稱其不誣參以朱子所云則畢氏之說未爲妄矣紹興書目有不爲子撰著法通考又有青城山人書未審較畢氏得失何如也

李氏輯易詮

宋志三卷

佚

舊唐書韜字習之涼武昭王之後貞元十四年登進士第太和初爲諫議大夫尋拜中書舍人九年檢校戶部尙書襄州刺史充山南東道節度使會昌中卒於鎮諡曰文

王得臣曰李韜作易詮論八卦之性古今說易者未嘗及曰自古小人在上最爲難去蓋得位得權而勢不得搖奪以四凶尙歷堯至舜而後能去嘗玩易之夬夬一陰在上五陽并進以剛決柔宜若易然乃爻詞俱險而肆蓋一小人在上故易曰剛長乃終也又曰道生一一生二二生三三生萬物故自道而下數至於三則天地人之道備矣聖人畫卦始止於三謂三才之道因而重之乃可以觀變予觀重卦之內至於三位則有小成變革之理如乾之九四則曰乾道乃革革之九三曰革言三就是也推此而求其變則可以思過半矣

董真卿曰李氏易七卷先說八卦次列六十四卦并雜卦

蔡氏廣成周易啓源

宋志十卷

未見一齋書目有

周易外義

宋志三卷

佚

晁公武曰蔡廣成撰李邕鄆云唐人田偉置於王昭素之下今從李說有德恆德言德庸德翰四目皆作問對凡三十六篇

胡一桂曰廣成唐太子左諭德其書皆問答語

按二書紹興書目俱有之外義止一卷

韋氏顓易蘊解

佚

舊唐書顓字周仁精陰陽象緯經略風俗之書以門蔭補千牛備身歷吏部侍郎著易蘊解推演潛亢終始之義甚有奧旨

錢希白曰顓見素孫

徐氏鄆周易新義

三卷

佚

唐會要太和元年六月直講徐鄆上周易新義三卷

裴氏通易書

新唐志一百五十卷

佚

新唐書注通士淹子文宗訪以易義令進所撰書

宰相世系表通字又玄檢校禮部尚書

王應麟曰通自祭酒改詹事因中謝上知通有易學因訪以精義仍命進所習經本著易元解三卷并總論二十卷易禦寇十一卷易洗心二十卷

陸氏希聲周易傳

新唐志二卷宋志十三卷中興書目六卷周易會通作十卷

佚

希聲自序曰予乾符初任右拾遺歲莫端居夢在大河之陽曠野數百里有三人偃臥東首長各數十丈有告者曰上伏羲中文王下孔子也三聖皆無言意中甚愕寤而震悸伏而思之河與天通圖之自出三聖衡列乾之象也天道無言示人以象天將以易道畀予乎由是考覈少小以來所集諸家注說貫以自得之理著易傳十篇傳上經爲第一下經爲第二所以列象象之微辭測卦爻

之奧義第三篇演文言之純粹一作精以顯聖人之蹟第四篇伸繫辭之微意以彰易道之神第五篇原作易之始述列卦之序第六篇釋說卦之義辨反對之相資第六篇窮畫卦象之由生著奇耦之極第八篇明權輿律呂之末制作禮樂之原第九通天下之理第十成天下之務別撰作易圖一卷指說一卷釋變一卷微旨一卷又以易經文字古今謬誤又撰證一卷

崇文總目唐右拾遺陸希聲撰希聲作易傳十篇易圖指說釋變微旨四篇初隴西李阮學其說以爲上下經傳二篇思屬甚妙故希聲自爲之解餘篇差顯不復爲註蓋近世之名家歟今二篇外餘篇逸

中興書目希聲著易傳十篇傳上經爲第一篇下經爲第二篇又有演文言伸繫辭等八篇又易圖一卷指說一卷釋變微旨各一卷通爲十卷又文證一卷非十編之目今惟存上下經傳分爲六卷微旨分爲三卷

晁說之曰虞翻夢吞三爻而通易陸希聲夢三聖人而捨彖象作傳意夫二子者可語伏羲之易也翻乃蔽於互體旁通希聲不出王輔嗣之藩籬惜哉

朱震曰陸氏易傳削去爻象自謂彌縫其闕諧音以發其辭體正如子雲作太玄俾學者爲進易之梯階至於言義則自有中否晁公武曰希聲大順中棄官居陽羨自號君陽遁叟著傳十卷別撰易圖一指說一釋變一微旨通十卷

葛立方曰希聲隱居宜興君陽山今金沙寺其故宅也嘗著易傳十卷自序謂夢在大河之陽有三人偃臥東首上伏羲中文王下孔子以易道畀予遂悟八卦小成之位質之象數有符契且云今年四十有七已及聖人之年於是作易傳以授門人崔澈王贊之徒復自爲注今觀其書無可取者而怪誕如此後避難死於道路蓋不能終君陽之居也

陳振孫曰按唐志有易傳二卷中興書目作六卷別出微旨三卷今所謂解說者上下經共一冊不分卷有序言著易傳十篇七篇以上解易義之精微八篇以下廣易道之旁行第爲六卷又撰易圖指說釋變微旨各一卷通爲十卷其上下經蓋第一第二篇經文一句傳亦一句門人以爲難曉故復爲之解然則其全書十卷不盡傳矣家舊惟有微旨續得解說一編始知其詳

馮椅曰希聲本蘇州吳縣人

周易微旨

通志三卷

佚

晁公武曰微旨皆設問答

按紹興書目有之

高氏定周易外傳

唐志二十二卷

佚

舊唐書高定郢子仕至京兆府參軍

王讜曰高貞公之子定通王氏易爲圖合八出以畫八卦上圓下方合則爲重轉則爲演七轉爲六十四卦六甲八節備焉又著外傳二十二篇定小字董董時人多以小字稱

盧氏行超易義

唐志五卷

佚

新唐書注字孟起大中年六合丞

邢氏璣周易正義補闕

宋志七卷 崇文目同

佚

周易略例疏 紹興書目作正義

宋志三卷 紹興書目二卷

存止一卷

璿自序曰王輔嗣略例大則總一部之指歸小則明六爻之得失承乘逆順之理應變情僞之端用有行藏辭有險易觀之者可以經緯天地探測鬼神匡濟邦家推辟咎悔雖人非上聖亦近代一賢臣謹依其文輒爲注解雖不足敷弘易道庶幾有裨於教義亦猶螢燐增輝於太陽涓流助深於巨壑臣之志也

陳振孫曰唐四門助教邢璿撰按蜀本略例有璿所注止有篇首釋略例二字文與此同餘皆不然此本亦淺近無義理姑存之

張氏張周易啓玄

宋志一卷

佚

程迥曰唐人張轅作周易啓玄曰老陽變成少陰老陰變成少陽趙汝楨曰張氏筮法初揲掛一次兩揲不掛左手不揲右手但以

右手之著足滿左手之餘初揲餘一餘二足滿五餘三餘四足滿九次兩揲餘一餘二足滿四餘三餘四足滿八爲九爲六者各八爲七爲八者各二十四按次兩揲不掛則不合四營不掛右手則不合再扚且初變左餘一右必餘三左餘二右必餘二與掛而爲五者乃左右揲四之所餘蓋理之自然勢有不容易者今旣不揲右但視左所餘而益之則多寡直可任情何必滿五滿九耶

按紹興書目有之

任氏奉古周易發題

通志一卷

佚

楊繪曰莊遵以易傳楊雄雄傳侯芭至沛周鄉鄉傳樂安任奉古

按紹興書目有之

蘇氏鶚周易開玄關

通考一卷

佚

晁公武曰唐蘇鶚撰鶚自序云五代祖晉官至吏部侍郎學兼天人嘗製八卦論爲世所傳遭亂遺墜而簡編尙有存者鶚乃略演

其旨於此

陳振孫曰武功蘇鶚德祥唐光啓進士

梁氏運周易雜占筮訣文

唐志二卷

佚

史氏謹周易口訣義宋志作史文徵

宋志六卷

佚

崇文總目河南史證撰不詳何代人其書直鈔孔氏疏以便講習

故曰口訣

晁公武曰史證抄注疏以便講習田氏乃以爲魏鄭公撰誤也

陳振孫曰三朝史志有其書非唐則五代人也避諱作證字

李氏含光周易義略

三篇

未見

劉大彬曰唐正議大夫玄靜先生姓李名含光江都人本姓弘避則天諱易焉神龍初爲道士居龍興觀尋居嵩陽二十年玄宗召

詣闕詔居陽臺觀歲餘稱疾乞還句曲勅居紫陽觀賜號著周易義略三篇

王氏遠知易總

十五卷

佚

龍城錄上元中台州道士王遠知善易於觀感間曲盡微妙善知人死生禍福作易總十五卷

成氏玄英周易窮寂圖

宋志五卷

佚

晁公武曰唐成玄英撰錯綜六十四卦演九宮以直年月日推國家之吉凶玄英道士也故道藏錄之或云釋仁英撰未知孰是易流演

宋志五卷

佚

按紹興書目有之

釋一行易傳

十二卷

佚今惟大演周易本義一卷存

舊唐書僧一行姓張氏先名遂魏州昌樂人襄州都督鄴國公公謹之孫也精曆象陰陽五行之學時道士尹崇博學先達一行出所撰大衍玄圖及義決一卷示崇崇大驚因與一行談其奧蹟甚嗟伏之謂人曰此後生顏子也尋出家爲僧隱於嵩山睿宗卽位以禮徵固辭以疾開元五年玄宗令其族叔禮部郎中洽賁勅書強起之一行尤明著述撰大衍論三卷卒賜諡大慧禪師中興書目一行易傳十二卷元闕四卷朱震曰孟喜京房之學其書概見於一行所集大約皆自子夏傳而出

按紹興闕書目有唐易論一卷疑卽一行書

杜氏失名新易林占

唐志三卷

佚

任氏正一周易甘棠正義

宋志三十卷